



Helge Haukås
Storvikvegen 30
6443 TORNES I ROMSDAL

Saksbehandlar, innvalstelefon
Bjarne Otnes, 71 25 85 75

Løyve til motorferdsel i samband med vedlikehald av hytte Gule-Stavikmyrane naturreservat – Hustadvika kommune

Statsforvaltaren i Møre og Romsdal viser til søknad av 10.06.2021 og kart ettersendt 07.07.2021.

Søknaden

Det er søkt om å dispensasjon for å køyre inn takplater og vindu for vedlikehald av hytte på gnr 118 bnnr 8 ved Myrsteinen i Gule- Stavikmyrane naturreservat. Køyringa skal skje etter etablert køyretrasé, jf. kart. Det er søkt om inntil tre turar med ATV.

Lovgrunnlag

Søknaden er vurdert opp mot gjeldande verneforskrift for Gule-Stavikmyrane naturreservat, fastsett ved kongeleg resolusjon 13. desember 1996 (FOR-1996-12-13-1212).

Etter kap. IV nr. 3 er det forbod mot motorisert ferdsel. Etter kap. VI nr. 3 kan Statsforvaltaren gi løyve til motorferdsel i samband med vedlikehald av eksisterande hytte.

Søknaden må også vurderast etter prinsippa i naturmangfaldlova (nml) §§ 8-12, jf. § 7. Prinsippa omfattar vurdering av kunnskapsgrunnlag (§ 8), føre-var-omsyn (§ 9), samla belastning (§ 10), kostnader for å hindre skade på naturmangfald (§ 11) og miljøforsvarleg teknikk/driftsmetode (§ 12).

Statsforvaltaren si vurdering

Formålet med fredinga er å ta vare på ein sentral del av eit av landets største myrlandskap. Lokaliteten har verdi som nasjonalt typeområde.

Romsdal tingrett avsa erstatningsskjøn 13. juli 1999 etter vedtak om vern av Gule-Stavikmyrane. Følgjande skjønnsføresegnad låg etter framlegg frå staten til grunn for avgjerda: *Traktorveg, felles for gnr118 kan opprettholdes slik den i dag går fra reservatgrensen på gnr. 118 bnr. 6 og langs dagens trase (nord) fram til endepunkt på bnr. 8 (avlagt på reservatkartet). Det tillates ikke langsgående drenering, men forøvrig kan traseen tilføres nødvendig masse for opprettholdelse av traseen.*

Statsforvaltaren legg til grunn at transporten er i samsvar med dei føringane skjønnet gir for forvaltninga av reservatet og bruk av køyretraséen. Mildt og vått vinterklima gjer at vintertransport



på frosen og snødekt mark ikkje er eit påliteleg alternativ. Traséen har lav bereevne, men det er no tørt i terrenget, og vêrutsiktene tilseier at dette vil halde seg lenge nok til at transporten kan gjennomførast under gode forhold. Vi finn difor at transporten kan gjennomførast som omsøkt utan at det vil gi nemneverdig skade på verneverdiane i reservatet. Køytinga gir heller ikkje vesentleg auke i totalbelastninga av (lovleg) køyting i reservatet (jf. nml § 10), og følgjer uansett avsett trasé til formålet. Vi reknar kunnskapsgrunnlaget som godt (nml § 8), og føre-var-prinsippet (nml § 9) får ikkje vesentleg vekt.

Lar ikkje transporten seg gjennomføre før det eventuelt blir blautt i området har vi sett vilkår om at transporten blir utsett til det blir tørrare att, jf. nml §§ 11 og 12. Det ligg stor grad av skjøn for søkar i dette.

Vedtak

Statsforvaltaren i Møre og Romsdal gir Helge Haukås løyve til køyting med ATV for transport av materiell for vedlikehald av hytta ved Myrstein. Heimel for vedtaket er kap. VI nr. 3 i verneforskrifta for Gule-Stavikmyrane naturreservat.

Vilkår

- Løyvet gjeld for 3 turar t/r fram til og med 30.09.2021.
- Transporten skal gjennomførast etter etablert køyretrasé i samsvar med kart oversendt 07.07.2021.
- Transporten skal skje når det er tørt i terrenget. Kjem det større mengder regn skal køytinga utsettast til det tørkar opp.
- Løyvet skal vere med under transporten.

Anna lovverk

Vi gjer merksam på at vedtaket berre omfattar dispensasjon frå verneforskrifta i medhald av naturmangfaldlova. Nødvendige løyve etter anna lovverk må avklarast med rette myndigheiter.

Klage på vedtaket

Partane i saka eller andre med rettsleg klageinteresse kan klage på vedtaket innan tre veker frå det er mottatt. Klagen må vere grunngitt, og skal sendast til Statsforvaltaren. Miljødirektoratet avgjer klagen dersom Statsforvaltaren opprettheld vedtaket. Reglane om klage på vedtak går fram av kapittel VI i forvaltningslova.

Med helsing

Linda Aaram (e.f.)
miljøverndirektør

Bjarne Otnes
fagleiar

Dokumentet er elektronisk godkjent

Kopi til:

Hustadvika kommune Tingplassen 1 6440 ELNESVÅGEN